



FM15/33  
Nuuk 23. April 2015  
Iddimangiiu Bianco

**Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-imi ukiakkut ataatsimiinnermi Inatsisartut inatsisaattut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aaja Chemnitz Larsen, Inuit Ataqatigiit)

Inuiaqatigiinni pingaartittuagarput tassaavoq meeqqat toqqissisimallutik peroriartornissai, tamannalu pisussaaffiliivoq annertuumik inuiaqatigiinnut. Meeqqat inuusuttullu inersimasunik attaveqarfissaaleqisarnerat sumiginnagaasarnerallu akuerinngilarput.

Anguniagaq tassaassaaq meeqqat tamarmik ilaqutariinni toqqissisimasumik alliarorfissaqarnissaat. Meeqqat angerlarsimaffiup avataanut inissinneqartarnerat minnerpaaffimmiittariaqarpoq. Meeqqat pisinnaatitaaffiisa malinneqarnissaat pisinnaatitaaffiillu ilisimaneqarnissaat qulakkiissavagut. Inuit Ataqatigiinniit meeqqat pisinnaatitaaffisigut iliuusissiortoqarnissaa kissaatigaarput, taannalu aqutigalugu piffissaq sivirusunerusoq atorlugu, siunnerfeqartumilli, meeqqat pisinnaatitaaffisigut pitsanngorsaavigineqarnissaat sulissutigissavarput. Tamatta meerartatsinnut inuusuttortatsinnullu ataatsimut akisussaaffeqarpugut.

Meeqqat pisinnaatitaaffiisa nunatsinni tamakkiisumik inatsisitigut tunngavilernissaa Naalagaaffiit Peqatigiit kaammattuutaa Inuit Ataqatigiinniit isumaqatigaarput, Isumaqaratta pingaaruteqartoq meeqqat inatsisitigut inissisimanagerat nukittuuusariaqartoq.

Tassuunakkummi qulakkeerneqartussat ilagissavaat eqqartuussivinni pisortanilu toqqammaveqarnerusumik meeraq illersorneqarnera, inuiaqatigiillu ilisimasaqarnerulernerat meeqqat pisinnaatitaaffii pillugit.

Nalunngereerparpulli 1992-imili atuuttussanngortinneqartoq Naalagaaffiit Peqatigiit meeqqat pillugit isumaqatigiissutaat, taannalu pisussaaffik atuutsinneqarluni taamanili. Uagulli anguniagarput tassaavoq meeraq ersarissumik toqqammavilimmik inatsisitigut illersugaalluarnissaa inuttut pisinnaatitaaffii eqqarsaatigalugit.

Misissueqqissaartoqaqqinneqarnissaa pisariaqartinngilarput, iliuuseqarnissarli pisariaqartinneqarpoq. Tassami Kalaallit Nunaanni Inuttut pisinnaatitaaffinnut Siunnersuisoqatigiinniit nunani tamalaani isumaqatigiissutit meeqqat pisinnaatitaaffiitut qanoq isumaqarnerusut nassuiaasiortoqarsimavoq.

Taamatut naatsumik oqaaseqarlunga siunnersuut ataatsimiitsitamut ingerlatinnissaa innersuussutigaaara, neriullungalu ataatsimiitsitami peqqissaartumik suliarineqarumaartoq.

Qujanaq